



KEMENTERIAN PERDAGANGAN DALAM NEGERI  
DAN KOS SARA HIDUP

---

---

# **KERATAN AKHBAR DAN MEDIA ONLINE UNTUK MAKLUMAN :**

**Y.B. MENTERI  
Y.B. TIMBALAN MENTERI  
Y.BHG. KSU  
Y.BHG. TKSU (PDN)  
Y.BHG. TKSU (PPP)  
SETIAUSAHA AKHBAR**

---

---

**8 JANUARI 2023 (AHAD)**



KEMENTERIAN PERDAGANGAN DALAM NEGERI  
DAN KOS SARA HIDUP

---

---

# **KERATAN AKHBAR DAN MEDIA ONLINE (KPDN)**

---

---

**8 JANUARI 2023 (AHAD)**

## KPDN sasar pertumbuhan 20 peratus industri francais



**AZMAN** (tiga kiri) memotong riben sebagai simbolik Majlis Pelancaran Outlet Oldtown White Coffee di IOI City Mall, Putrajaya semalam.

**PUTRAJAYA** – Kementerian Perdagangan Dalam Negeri dan Kos Sara Hidup (KPDN) menasaskan pertumbuhan antara 20 hingga 30 peratus industri francais negara tahun ini.

Ketua Setiausaha KPDN, Datuk Azman Mohd. Yusof berkata, sasaran pertumbuhan itu dijangka dapat dicapai sekiranya kesemua pihak yang terlibat memainkan peranan dalam mengusahakan suatu bentuk insentif yang baik.

Menurutnya, KPDN akan terus memberi sokongan penuh penglibatan masyarakat dalam sektor francais termasuk mereka yang

ingin menaik taraf perniagaan mereka kepada sistem francais.

"Nilai ekonomi kepada perniagaan francais telah mencecah RM25 bilion dan saya percaya ini dapat dipertingkatkan pada tahun mendatang sungguh pun tahun ini dikatakan mencabar," katanya semalam.

Azman berkata, program promosi perniagaan francais di dalam dan luar negara juga akan terus dipergiat bagi menyokong penggiat serta usahawan francais mempromosikan perniagaan mereka.

Tambahnya, KPDN juga sentiasa berusaha memikirkan so-

lusi dengan mengatasi masalah birokrasi supaya mereka yang ingin menceburi bidang tersebut segera mendapatkan kelulusan.

"Kalau nak buka outlet kemungkinan banyak terlibat dengan agensi lain, kita (KPDN) terlibat dengan memberi lesen. Mungkin kita akan duduk bersama agensi kerajaan lain untuk membincangkan semula apa yang boleh kita permudahkan.

"Kerajaan bantu dalam pelbagai aspek dari segi kebajikan, sebagai pemudah cara dan memikirkan solusi mengatasi masalah kareh birokrasi," ujarnya.



ANGGOTA penguat kuasa KPDN memeriksa sebahagian tong berisi diesel dalam serbuan di sebuah rumah di Padang Besar semalam.

Jual kepada warga asing untuk kaut untung

## Sorok lebih 3,000 liter diesel dalam rumah

Oleh SYED AZLAN SAYID HIZAR

**PADANG BESAR** – Tembelang seorang lelaki yang menjadikan rumahnya sebagai stor mengumpul lebih 3,000 liter diesel bersubsidi terbongkar apabila dia ditahan dalam serbuan di sini semalam.

Difahamkan, minyak tersebut akan dijual kepada pemilik kenderaan warga asing bagi mengaut keuntungan.

Serbuan pada pukul 10 pagi itu dilakukan oleh sepasukan penguat kuasa Kementerian Perdagangan Dalam Negeri dan Kos Sara Hidup (KPDN) Perlis selepas menjalankan risikan selama dua

minggu.

Ketua Pegawai Penguat Kuasa KPDN Perlis, Mohamad Amir Abdullah berkata, serbuan tersebut turut melibatkan rampasan bahan bakar bersubsidi, peralatan pemindahan dan penyimpanan minyak dan juga satu tangkapan.

"Selepas menjalankan risikan dan mendapat maklumat, pasukan penguat kuasa menyerbu premis berkenaan dan pemeriksaan mendapati terdapat sejumlah 3,380 liter cecair diesel bersubsidi disimpan di stor pada bahagian belakang rumah berkenaan.

"Pihak penguat kuasa turut merampas tong drum, jerry can,

intermediate bulk containers tank dan pam minyak bersama hos getah dengan nilai keseluruhan berjumlah RM9,447," katanya.

Tambah beliau, seorang lelaki tempatan berusia lewat 20-an turut ditahan bagi membantu siasatan lanjut berkaitan aktiviti tersebut.

"Kita akan meneruskan pemantauan bagi memastikan tiada mana-mana pihak mengambil kesempatan menjual bahan api bersubsidi diesel kepada kenderaan asing," jelasnya.

Kata Mohamad Amir, kes berkenaan disiasat mengikut Akta Kawalan Bekalan 1961.